

**ZORTZIKO BATZUEK KRISTOBAL KOLON AUNDIARI**

¿Nor zayo bat munduan  
Bere berdingarri,  
Lur berriak billatzen  
Jenobatarrari?  
Mundu bat gendukanok  
Orain ditugu bi,  
Glori au zor diogu  
Kristobal Kolon-i.

Kristobal, zaigu gizon  
Ain miragarria,  
Batez ere Indien  
Beneragarria;  
Zeren beronegatik  
Gaur duten argia,  
Jesukristok zerutik  
Lurrera jechia.

¿Zer zan beste gauzarik  
Ezpada fedea,  
Sututzeko Kolonen  
Biotz ain noblea?  
Kristau egite arren  
Infel jendea,  
Arriskuan ipiñi  
Zuen bizitza.

Ichasoz iristean  
Zioan aldera,  
Agertzen da legorra  
Ark esan bezela;  
Ontzitik bereala  
Egiñik atera,  
Inkatzen du lurrean  
Kristoren bandera.

Len ezekian iñork  
Zer zan Amerika,  
Nondik ondasun asko  
Degun ekarrita;  
Kristobal-gatik gaude  
Aberats jarrita,  
Bere alabantzan jo  
Dezagun musika.

Musikarekin nasi  
Gañera kantatu,  
Kristobal zeruraño  
Dezagun alchatu;  
Lareun urte luzeak  
Naiz egin pasatu,  
Aren azaiñ andiak  
Ezin dira aztu.

Ezin litezke aztu  
Kristobalen lanak,  
Legortzen ezpadira  
Ichaso zabalak;  
Nola ziran atera  
Ondo aren planak,  
Esker asko zor dio  
Kristandade danak.

Onra dezagun bada  
Al dezagun añan,

Bakoitzak bere moduz  
Norberen izkeran;  
Gizaldi guztietan  
Egiñik onelan,  
Kristobal biziko da  
Ill gabe sekulan.

Bizi zaite Kristobal  
Gloriaz goyetan,  
Gizonik aundien bat  
Zu zera benetan;  
Eguzkia nola dan  
Buru izarretan,  
Zu zera argiena  
Ichas-gizonetan.

Jantzi gaur nai nizuke  
Alako koroia,  
Erregiena baño  
Askozaz obia;  
Etzeralako erri  
Batzuen jabia,  
Baizikan mundu berri  
Baten jaun andia.

FELIPE ARRESE TA BEITIA.

Ochandton, 1892-ko Agorrillean.

